

UN PO' DE STORIA DE URÉN

Quasi sessant'ann fá,
in Varisela,
nel trentasess,
(in via Adige
gh'era ammó la scess)
al Circul "Fratellanza",
un grupp de giuvinott,
con tanta baldanza,
e appasiuná de bócc,
han fundá la Bocciofila
dei "Fratelli Secondi"
in memoria de du fredei,
giuvin, fort e bei,
Ufficiai dell'Esercit,
mort in la prima guerra mundial.
Eran i bagaj del Segretari
dal Comun da Urén.

Dopu avé furmá ul Cunsili
con tutt i tesserati,
ul prim President,
Pio Vimercati,
cun i bravi Consiglieri
Richén dal Circul e
Ambrusén dala Palazina,
sín dá da fá
per regulamentá
l'organizzazion
cunt la Federazion,
e per pudé fá di gari
per furmá i campión.

A chi temp lá,
la television,
la gh'era no;
e num bagaj,
ala sira,
dopu scenáa,
lustraum i oeucc
andandu al Circul
a vedé i gari da bócc.

Oltre la Bocciofila
Fratelli Secondi,
al Baselon,
dala sciura Sandrina,
avevan fundá la Bocciofila
Fratelli Brambilla,
in memoria dei tri fredei
mort in guera anca quei;
eran i bagaj
de Richén dal Pulvara.

A fá di gari,
s'é incominciá;
a sfidass
fra i dó Societá;
chi ai punt eran bravi,
chi invece a "rigulá".
Varisela, con costanza,
ghe teneva al Fratellanza,
qui d'insú, cont resón,
a tifava per ul Baselón.
Se ul sud, al vinceva,
l'era ul nord ch' al perdeva,
ma prest o tardi la fortuna,
la impatava: una a una.

Passá un ann, han fá
la prima gara intersocial,
individual e trasversal:
in final gh'é arivá
per i dó Societá,
Andrea Crippa
de la "Secondi",
e Mario Mondonico
de la "Brambilla".

L'ha spuntada
l'Andrea dal Verdura,
la vittoria l'é stada dura,
che come puntista,
l'é stá bonn
da mett semper ul balén
ben visén,
sútta i curdón,
batendo per vinticinq
a vintiquater,
cunt emuzión,
Mario dal Vitt
del Baselón.

L'é una storia
minga tanta lunga
da cuntá sù,
ma l'é tanta bela
d'ascultà.
Tant'é vera
che i protagonisti
in ché ancamó
a testimoniá.